

Dogter van Sion beweeg in 'n geestelike faset van hul geloof in

Toe ons nog op die Bloedrivierterrein was, het ons gedink dat Abba Vader ons fisies sou verlos vanaf Bloedrivier en dat ons 'n fisiese grondgebied sou bekom. Namate ons in Pretoria met ons Vader se werk besig geraak het, het ons begin insien dat die huis wat ons moet bou, 'n geestelike huis in die harte van ons volk sou wees, en nie 'n fisiese grondgebied nie. Die volk sou eenparig agter ons Verlosser, Jahshua, moes gaan staan, binne Sy leer van liefde begin wandel, en dan sou Hy ons self verlos. So het ons stadigaan begin wegbeweeg van die dooie letter van die wet en het ons die wet deur die liefde van Jahshua begin beskou en doen. Sy leer in die 4 evangelies het die fokus van ons bediening geword. In hierdie tyd verskyn die boekie, "**Naasteliefde**" en die beoefening daarvan word 'n voltydse bediening. Baie mense verlaat die Dogter van Sion in hierdie tyd, veral die oorlogmakers en grootpratere oor gewelddadige verset. Volgens hulle was ons wat agtergebly het, te pasifisties, en te veel behep met naasteliefde. Baie is teen die Dogter van Sion geskryf en gesê, publikasies het verskyn waarin ons met die owerhede verbind is, dat ons CIA geheime diens was, maar ons het ongestoord voortgegaan om vir ons volk, en ook vir hulle, te bid.

In hierdie tyd ontvang ek 'n visioen, wat so wonderlik was, dat ek vir dae daarna nog steeds die aanraking van ons Verlosser sou voel.

Visioen: *"Ek ry in 'n bakkie, met arbeiders agterop met bougereedskap. Voor langs my sit 'n persoon en bly aan my torring, wat my intens geïrriteer het. Skielik lui my selfoon en ek weet oombliklik dis my Vader op die lyn. Ek stop die bakkie, vlieg uit, gryp die foon teen my oor vas en met my ander hand styf teen my sy, asof op aandag, hoor ek die wonderbaarlikste vriendelikste Vaderstem. "More Dirk, moenie bekommerd wees oor hulle nie, ek is binnekort by julle". Wat 'n ongelooflike ervaring en boodskap! In my visioen, ry ek verder met die bakkie, die irriterende persoon is weg en ons stop by 'n bouterrein, waar 'n ou dunnerige verweerde fondasie lê, waarnaas ons begin met die uitpen van 'n nuwe en beter fondasie."* Toe eindig die visioen.

Die betekenis was duidelik. JaHshua belowe om binnekort die irriterendes in Dogter van Sion weg te vat, en Hyself sou by ons wees in Sy Woord, en daarmee sou ons die nuwe fondament kon bou langs die ou verweerde vlak fondament. Dit het gedui op die nuwe Melgisedek orde, wat die Nuwe Leer van liefde van ons Messias as grondslag sou hê.

Direk na hierdie visioen ontdek ons toe die wonderlikste geskryfte wat nog ooit gedurende die afgelope 170 jaar verskyn het, naamlik die werke van

die Oostenrykse profeet, Jakob Lorber. Hierdie werke is 'n direkte diktaat van Jahshua Self aan Lorber, en waarin die volgende voorkom:

1. JaHshua se hele 3,5 jaar getuie periode, vanaf Sy doop in die Jordaan tot by Sy kruisiging by Golgotha, in 'n dag tot dag verhaal geopenbaar deur Homself.
2. Sy drie dae in die tempel toe Hy 12 jaar oud was, sowel as Sy jeugjare in Egipte.
3. Die wonderbaarlike samestelling van die heelal.
4. Oor die lewe in die hiernamaals.
5. Oor die pre-vloed gebeurtenisse, vanaf Adam se skepping tot by Noag.
6. Die innerlike werking van die aarde, die son en die maan.
7. Die geestelike samestelling van die planeete en hul hemelse inwoners.
8. Die samestelling van die mens se siel, gees en liggaam en ons pre-geboorte ervarings.

Die huidige werke beslaan sowat 20 boeke met ongeveer 12 000 geskrewe bladsye. Dit alles deur JaHshua in die eerste persoon! Die gedeelte oor Sy aardse prediking word genoem "**Die Groot Johannes Evangelie**", en is ook die boekie wat Johannes, die skrywer op Patmos, moes eet, wat soet in die mond en bitter in die maag was (**Openbaring 10**). Hy moes hierdie boekie verborge hou tot aan die einde van die 6000 jaar periode. Hierdie evangelie is waarlik soet, dit klink wonderlik op die oor, maar... as 'n mens dit moet absorbeer/eet, dan vind menige geestelik maag die werke te bitter om uit te voer.

Dit is ook hierdie boeke wat oopgemaak word in **Openbaring 5**, waar slegs die Lam waardig bevind word om die boeke oop te maak in ons harte, en waarna ons dan 'n nuwe lied sing, wat niemand anders kan sing, wat nie die Nuwe Openbaring het nie. Ook is dit net hierdie wat die boeke in hulleself - in hulle harte - oopgemaak kry, dit is net hulle wat saam met die Lam op die Berg Sion is, dis net hulle wat gemerk is, en dis weereens net hulle wat die nuwe lied in **Openbaring 14** sing saam met JaHshua.

Wat die tydsberekening van hierdie boeke nog meer merkwaardig maak, is die tydperk waarin dit aan die Oos-tienrykse Duitser, Jakob Lorber, gegee is, naamlik vanaf 1840 tot 1864. Dit het dieselfde tyd plaasgevind toe ons Vader die fisiese Juda-volk (Dogter van Sion) hier aan die Suidpunt van Afrika gevestig het in hulle Boererepublieke na 1838. Terselfdertyd het Hy deur die Duitse lyn van Juda die geestelike inligting (Dogter van Jerusalem) deurgegee wat sowat 160 jaar later gebruik sou word. JaHshua het ook aan Lorber bevestig dat hy binne die koningslyn van Dawid was.